

Lettre Jèrriaise, Mar 2025.

Bouônjour tout l'monde,

Ch'est Ken Vibert dé Grosnez tchi vos présente la lettre Jèrriaise aniet lé 1ié d'Mar 2025.

Pâques s'en va être hardi tard ch't'année, pas d'avant l'20 d'Avri. V'là tchi veurt dithe qué not' fil'ye Alyson a peu c'menchi l'entraînement dé ses j'vaux d'course bein pus tard qué d'habitude. J'en si bein seux qu'ou n'est pon au couothant tchi faut envithon 13 semaines pour entraîner un j'va d'course pour sa preunmié course dé l'année. Alyson a entraîné des j'vaux d'course d'pis l'âge dé 16 ans et a gangni lé championnat des entraîneurs des Îles dé la Manche eune vraiment èrmerquabl'ye 18 fais.

Les j'vaux ont 'té dans les clios à l'hèrbe, à travers l'Hivé, d'pis les dreines courses au mais d'Septembre. I' n'ont pon vêtchu seulement sus d'l'hèrbe car il' ont 'té souongnis, matin et sé, touos les jours, avec des nouaix concentrées, spécialement pour des j'vaux d'course tchi n'sont pon à courser. 13 semaines d'avant les preunmiéthes courses, tchi s'pâssent tréjous lé Lundi d'Pâques, i' c'mencht à les rentrer dans l's étab'l'yes. Il' ont lus pouail (pé) tondu pour tch'i' n' suent pon quand i' c'mencht en travas, et étout i' sont féthés car i' n'ont pon ieu d'fièrs tandis tch'i' 'taient à l'hèrbe.

I' c'mencht à marchi les routes, eune démi-heuthe touos les jours. Deux'trais s'maines pus tard i c'mencht à faithe eune heuthe par jour. I' d'valent à L'Êtacq et marchent amont l'mont du Valet. Pus tard i' s'en vont y trotter pour développer les muscl'yes dans lus tchiêsses dé driéthe. Tout chu temps i' font eune heuthe dans lé carrousel à marchi pour des j'vaux. Ou peut y'en mett' 6 en même temps, et au Dînmanche quand les j'vaux n'vont pon sus la route, lé carrousel lî donne la chance dé netti les stâles, sans l'embête des j'vaux.

À m'suthe qué les s'maines se pâssent lé montant et la qualité des nouaix tch'i' mangent augmentent et i' d'veinnent dé pus en pus folâtres et difficiles à maîtrisi. Alyson emplyie 3 hardelles pèrmanentes, et un bouôn gas pour monter les pus difficiles j'vaux. I' c'mencht à les descendre sus la grêve au Brayé pour les marchi et trotter sus l'sablion, et pis graduellement les

couôrre pus vite, à un galop assez doux. I' n' les couôrre pon à pliein galop d'avant les dreines deux ou trais s'maines.

Ch'est là qué l' jugement et l' expéthience dé l' entraîneur est essentiel. I' faut saver combein tch'i' faut les couôrre, car châque j'va est difféthent, châque j'va est un individu et a des difféthents bésouains. Ch'est là étout tch'i' faut des emplyés tchi connaissent lus mêtchi, car les j'vaux sont nêrveux et pon aîsis à contrôler.

Jusqu'à ch't' heu Alyson a ieu sa fil'ye Victoria pouor l'aîdgi avec ses j'vaux difficiles, mais ch't'année i' faut qu'ou graie sans lyi, car Victoria est en travas en Angliétêrre, et n'pouôrra v'nîn raîque pouor lé jour des courses. Ou travâle pouor un entraîneur tch'a huiptante j'vaux d'course dans ses établ'yes, et oulle est hardi embarâssée. Ou c'menche à 6 heuthes du matîn et oulle est responsabl'ye pouor 5 j'vaux tch' ou monte touos les matîns. L'arlévée ou r'veint ès établ'yes pouor les netti et les souogni.

Oulle a san vièr j'va d'course avec lyi sus eune grand' fêrme à 10 minnutes d'éyou tch'ou d'meuthe. Ou va l'souogni et l'mettre au clios à 5 heuthes du matîn, d'avant d'aller en travas et pis oulle y r'touônne lé sé pouor netti s'n établ'ye, lé rentrer et l'souogni. 2 ou 3 fais la s'maine ou trouve eune heuthe pouor lé monter et li donner d'exêrcice alentou des clios d'la fêrme.

Les jours qu'ou va ès courses, ou peut être en travas pouor 14 ou 15 heuthes dans la journée, et acouo r'être ès établ'yes à 5 heuthes lé préchain matîn. Ch'est une bouonne chose tch'ou n'a pon d'peux du travas chutte-là.

Et bein n'en v'là assez pouor aniet. Mèrcie d'm'aver êcouté et à la préchain fais.







